



*Senin, 21 Desember 2020*

**Ogen: Kuan-kuanen 3:5**



**Ernalem Man Dibata**



**K**ata pengajuk siisehken kitab Kuan-kuanen man anak perana eme `ernalemlah man Dibata alu ulat ukur, tujunna ngajuk anak singuda ibas masa ngudana gelah la menggantungkan diri kubas sura-surana, kesenangan ras pemetehna. Masa nguda megati semangat sierburak-burak seh maka lupa Dibata.

Sada kata mutiara si isuratken Mattiu Hagee, nina `Jangan bergantung kepada manusia karena mereka berubah seperti angin. Bergantung kepada Tuhan dan ketahuilah bahwa dia setia untuk menaati Firmannya'. Bergantung berarti ngandalkan manusia ntah e kerna kebayakenna, kepentaren ntah jabatenna. Megati kal mehaga siakap manusia alu embel-embelna ndai, banci jadi `deking', emaka lit ka nge manusia si `cari muka' guna sie. Terdauhen perbahan sie, lanai ka ia mehangke ntah mehamat man kalak sideban. Emaka isingetkenna terdauhen, manusia e banci berubah desken angin, la tertangkap, la terjemak. Banci sendah mehuli, meriah siakap ras ia tapi pagi kedun enda, lanai ka bage, sungsungan. Bagepe sendah banci bayak pagi musil, erpangkat pe banci labo lalap ia erkuasa. Emaka iumputina gelah ergantung man Dibata sabab IA setia, la mobah amin kai pe sijadi. Tetap erkeleng ate nandangi manusia .

Alu bage erpalasken renungenta paksa enda, mari siinget-inget kentisik kerna pengalamen geluhta, pasti nge enggo melala siidah ulih kalak si ernalem man manusia, kuga turiturinna dengen kuga kedungenna. Pasti secara pribadi, kita selaku moria, kalak Kristen la sitik pengalamen geluhta ntah kalak sideban si ernalem man Dibata. Alu mpergermetken sie tentuna kitape banci naksiken kegeluhen sibage rupa janah pasti beluh kita nentukan geluhta, ku ise kita ernalem ras kuga kita ndalani geluhta.